

Su Skori

MALUACREI

Appenas de su Soli su riflèssu  
s'apparit a su chizz'in s'orizzonti ,  
sempri cun vili e barbaru interessu  
giras boscus e campus de su monti ;

e de su pranu s'immensu possessu ,  
domus , nurascis , arcadas de ponti ,  
su campanili , su sacru cipressu....;  
pustis danzendu ti paras de fronti .

Suspèsu in s'ari a su cursu 'e su bentu  
càstias , cun ira , su senza difesa  
pilloni chi camminat disattentu...

po ddu distruggi . Sa bruttali impresa  
ponis in opra a s'adattu momentu .  
Solu po cussu s'anima est avesa .

Maluacrei

SA DOMU 'E BABBU MIU

Candu ddi passu accanta, ca m'osservada  
cun d'unu aspettu tristu e lamentosu  
unu longu romanzu si riservada,  
mi parit....! e po cussu penserosu  
mi fazzu; e senza mancu m'accatai,  
su passu tendu a curzu; e traballosu.  
Comente ohimi nehit: "Sighi andai!  
cà mi cuntentu solu si ti biu:  
tantu po mimi.... nudda podis fai!!!"

Pobéra domu béccia 'e babbu miu:  
aundi tottucantu hat'essi andau  
tantu beni chi prima hat possiddu?  
Damizanas, fascellas de muscau  
e carradas in fila, cun cuponis  
de monica, nuragus, cannonàu....!  
E po sa "Festa" 'e i s'ischissionis  
cun su latti in caddascius e sciveddas,  
....nd'antessi blu de prucessionis

de feminas, pippius, piccioccheddas!!!!  
E babbu, cun sa turra, dd'is preniat  
de latti caffetteras, pingiadeddas....!  
De tottu, coment'issa prima fiat  
non si notat nennancu su sinnali:  
marcàd'e Marti coment'e chi siat.  
Oh brutta sorti, ho destinu fatali!  
cà dda possidit s'amori ribellu:  
po cussu... persighia est de su mali!!!

Ma si puru de mésu su fragellu  
no benit iscanzàda unu momentu,  
po mimi... ad'essir sempri su prus bellu

robustu, riccu e forti "monumentu"!!!!.

MALJACREI

# L'ortu de Padovana

MALUACREI .

Béllu , ben'attrezzau  
de vasca e de molinu ,  
..scadent'est unu pagu 'e serradura !  
Su prusu est seminau  
a béllu corantinu :  
ravanellu eccelenti po dolciura ,  
làttia in cantidàdi ,  
fenugu meda n' 'hadi ;  
bòna parti de s'ortu est a birdura .  
De bentus contrastau ;  
de dògna bremi malu minacciau .!

Su tingiu a su fasolu ,  
a su caliu sa cugurra ;  
s'arrest'.....'e s'ortalizia a su screppeni .  
Su prus chi ponit dolu...  
dògna tantu una sùrra  
a su burriccu 'e mala intenzioni !!!

Su ddu biri mollèndu  
semp'r'in terra est fraghendù...  
po su traballu hat pagu passioni !

Drebéssi a camminai...  
est cussu chi non bollit imparai !.!

Maluacrei